

Strategia precauta tar la participaziun ad ovras

Consultaziun detagliada dal rapport d'energia

■ **(anr/fa) Suenter lunga discussiun ha decis il cussegl grond cun 90:16 ch'il chantun duaja examinar mo en singuls cas la pussaivladad da surpender la maioritad d'ina ovra, e betg per regla.**

Fin l'onn 2035 duai il consum d'energia en Grischun vegnir stabili sin 2000 uras gigawatt l'onn e la produziun augmentada per 1500 sin var 9500 uras gigawatt. Sco descrit en il rapport d'energia da la regenza per mauns dal cussegl grond vulan ins cuntanscher questas finamiras surtut cun energia idraulica. Suenter ina lunga debatta d'entrada l'emprim di da la sessiun ha il parlament grischun discussiunà gievgia detagliadamain il rapport davart la politica d'energia electrica dal chantun Grischun, numnà rapport d'energia. Quel rapport ha fatg la regenza en collavuraziun cun l'uffizi respunsabel causa las incumbensas da *Karl Heiz* (pld, Puschlav) e *Vincent Augustin* (pcd, Cuira), numnadamain da preschentar al parlament la situaziun actuala da l'energia en Grischun e las perspectivas e finamiras per l'avegnir.

Chantun vegn a defender ils dretgs d'aua

Simi Valär (pld, Tavau), il president da la Cumissiun per ambient, traffic ed energia, ha ditg ch'ils commembers da la cumissiun sajan da l'avis ch'ils dretgs d'aua, l'uschenumnada suveranità da las auas, dessia restar tar las vischnancas. Perquai ha fatg la cumissiun la proposta da fixar tar las emprimas tschintg strategias «che la regenza s'engaschia tar la confederaziun ch'ils dretgs d'aua restian vinavant chausa da las vischnancas e che las proceduras da permissiun per ovras idraulicas, da vent u da fotovoltaica vegnian simplifitgadas». *Vera Stiffler* (pld, Cuira) ha fatg la dumonda da formular questas strategias da maniera pli precisa. Cusseglia governativ *Mario Cavigelli* ha menziunà che la suveranità da las auas saja reglada en la constituziun federala, ch'ella saja chausa e possess dals chantuns. «Il

chantun vegn a defender quests dretgs», ha ditg Cavigelli, «saja quai cun agid dals parlamentarisch grischuns u era cun la Conferenza da las regenzas dals chantuns alpins.» Cun 91:20 vuschs ha approvà il cussegl grond la proposta da la cumissiun.

En singuls cas u adina?

Tar la finamira che riguarda la produziun da forza idraulica dad ovras grondas ha fatg la cumissiun la proposta da scriber «Il cussegl grond spetga che chantun e vischnancas examineschian en il singul cas la pussaivladad d'ina participaziun maioritaria ad in'ovra». *Andrea Thöny* (ps, Tschintg Vitgs) ha fatg la proposta da scriber «chantun e vischnancas han per regla en mira ina participaziun maioritaria ad in'ovra». Da quel avis eran tant la ps sco era la pcd. *Heinz Dudley* (pbd, Tschintg Vitgs) ha averti che questa formulaziun obligassia chantun e vischnancas da suprender era ils ristgs da las ovras e sa participar als custs ed al mantegniment da l'infrastructura. *Karl Heiz* ha ditg ch'i sa chapeschia da sasez che chantun e vischnancas examineschian questa pussaivladad, perquai ha'l proponi da stritgar questa frasa e nun acceptar la proposta da la cumissiun. Sco emprim ha votà il parlament davart la proposta da la cumissiun e quella da Thöny: Cun 90:16 ed ina abstenziun da la vusch ha il cussegl grond acceptà la formulaziun sco proponida da la cumissiun. Sco segunda ha gi lieu la votumaziun davart las propostas da la cumissiun u da *Karl Heiz*: Cun 98:9 vuschs ed ina abstenziun ha il parlament approvà la proposta da la cumissiun. Il cussegl grond ha prendi enconuschientscha dal rapport d'energia e decis singuls midaments. Quest rapport furma la basa per il cussegl grond per formular las finamiras e strategias da la politica d'electricità chantunala. Decisiuns davart mesiras concretas en chausa energia vegnan tratgas pir pli tard.



Cusseglia governativ Mario Cavigelli: «Il chantun vegn a defender ses dretgs en connex cun la forza idraulica.»